



5. maj 2026

UPA2026/64,143

Meeqqat aturfiani klassimi ataatsimi annerpaamik 18-inik atuartoqarnissaanik qulakkeerisumik inatsimmik atortuulersitsinissamik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

Demokraatit inatsisartuni eqimattaa

3. aamma 7. klassimi alloriarfinni allattariarsornermi pinngitsuugassaannngitsunik misilitsissutunik qitiusumit aalajangersarneqartunik atorunnaarsitsissallutik inatsisinut, malittarisassanullu allannguutunik pisariaqartunik saqqummiussinissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisit, malittarisassallu ukiumi aturfiusumi 2027/28-mi atuutsilersinneqarsinnaanngorlugit naammassineqassapput.

Demokraatit inatsisartuni eqimattaa

Siunnersuuteqarsimasunut qulequttanut soqutiginantunut pisariaqartunullu qujalluta Siumumiit ima ataatsimut oqaaseqarfigissavagut:

Imm. 64 pillugu, tassalu meeqqat aturfiani klassemi ataatsimi annerpaamik 18-inik atuartoqartarnissaa pillugu qulaqqeerinnittumik Naalakkersuisut peqquneqarnissaannik Inatsisartuni aaliangiiffigisassatut siunnersuutaavoq. Siumumiillu imaattumik oqaaseqarfigissavarput:

Qulequtaq una nutaajunngilaq aamma qinigaaffiup siuliini sammisaqattaareerparput. Maannali inatsisartut nutaat arlallit qinigaasimalerput, siunnersuutillu siusinnerusukkut sammeriikkat aamma aallaqqaataaneerlusalusooq eqqartortussanngorpagut.

Qulequtaq una pillugu 2019-mi §37 nr. 242 naapertorlugu Naalakkersuisuusimasumit akissutigineqarsimasooq naapertorlugu tassa meeqqat aturfiini klassit 18-nik atuartuuteqalertassappata nuna tamakkerlugu klassit nutaat 118-it pilersinneqassapput, nuummiinnaq ilaatigut klassit nutaat 23-it, tamassuma kingunerissavaa ilinniartitsisunut atorfiit nutaat 62-it inuttassarsiuunneqartussanngussammata tamannalu inuiaqatigiinnut 25 mio. koruuninik naleqassalluni. Taamanikkut akissuteqaatigineqartumittaaq erseqqissarneqarpoq meeqqat klassimiit klassimut nussorneqalissagaluarunik perorsaariaatsimut qanoq sunniuteqarumaarnersoq. Ullumikkut ilisimasatsituut meeqqat aturfianni atuartut nuummi iniiit ininut nuttartinneqattaarlutik atuartinneqarput, aturfissap atorneqarsinnaanngornissaata tungaanut, tamannalu aamma ilaqutariippassuarput minnerusumik annerusumilluunniit aamma eqqornerluivoq. Ilisimavarput ukiuni makkunani tulluuttunilu ilinniartitsisorpassuit soraarnerussutisiaqalertussat amerlammata, tamatumalu malitsigissavaa ilinniartitsisunik ilinniarsimasunik amigaaqarneq minnerulernavianngitsoq atuartut klassiniissinnaasut ikilinqarpata, ernumanarsinnaavorlu illoqarfiit nunaqarfiillu Nuup avataaniittut suli annertunerusumik ilinniarsimasunik amigaaqalernissaat.



Taamaattumik Siumumiit isumaqarpugut siunnersuut Naalakkersuisooqatigiinnermi isumaqatigiissummi ilaareersoq maanna qaqinneqartoq. Ammalu kommuunit nammineq pisinnaatitaaffeqareernerat oqaatigissavarput.

Siunnersuut tunngavimmigut pitsaasortaartoq kisiannili aamma mianerisassartai eqqarsaatigalugit Siumumiit isumaqarpugut kommuuninut aammalu nuna tamakkerlugu ilinniartitsisut amigaataaneri eqqarsaatigalugit isumatusaartumik suliaq una ataatsimiisitaliami suliarilluarneqartariaartoq.

Imm. 143 pillugu tassaavoq 3. aamma 7. klassemi alloriarfinni allattariarsornermi pinngitsuugassaangitsunik misilitsittarnerit pillugit siunnersuut:

Siunnersuuteqartup siunertaa paasisinnaagaluarlutigu, Siumumiit maluginiarparput siunnersuummi Danmarkimi misilittakkat aallaavigalugit tunngavilersuuteqartoqartoq. Naak Siumumiit meeqqat atuarfiini misilitsittarnerit sapinngisamik ilikkarsarnermut aqutissiuussinissaat iluaqutaanerpaamillu aaqqissuunneqartarnissaat pingaartikkaluarlutiguttaaq, nunatsinni meeqqat atuarfiini atuartut ilinniartitsisullu aallaavigalugit aaqqiissummik aalajangersaanissaq pingaartipparput, taamaasilluta iluaqutaasinnaanera annerusumik qulakkeersinnaajumaaratsigu, taamaattoq aamma IMAK-iminngaanniik tunngavilersuutigineqartut pingaartillutigit ilinniartitseriaatsinut ilinniartitsisunullu pitsaaneruseqarpat aaqqiissuussinissaq ilalerlutigu.

Naalakkersuisut allannguutissatut siunnersuutaani maluginiarparput suleqatigiissitamik amerlasuunik ilaasortalimmik pilersitsisoqarnissaa siunnersuutigineqartoq, tassungalu tunngatillugu siumumiit isumaqarpugut Naalakkersuisut siunnersuutaaniit suli pitsaaneruseqarpat allannguutissatut siunnersuummik imaattumik qaqitsiumavugut:

“Naalakkersuisut suleqatigiissitamik meeqqat atuarfiannik sullissisunik pingaaruteqartunik susassaartut aamma kattuffiit kommuunillu peqataatillugit pilersitsinissaannut Inatsisartut aalajangiinissaannut siunnersuut. Suleqatigiissitaq klassini atuaqatigiit amerlassusaannik pisariaqartitsiviusuni ikilitsivinnissamut periarfissanik qulaajaassaaq, perorsaanikkut aningaasatigullu kingunerisassai ilanngullugit, atuartitsinerup pilersaarusiortarnerani eqaannerulersitsinissamik nalilersuissaaq kiisalu maannakkut alloriarfinni misilitsittarnerit, ilikkagaqarniarnermut perorsaanermilu atuinermut ikorfartuutaanerulernissaat anguniarlugu, iluarsivigineqarnissaannik imaluunniit atorunnaarsinneqarnissaannik misissueqqissaarlunilu siunnersuutit saqqummiussissaaq. Sulineq siunissami inatsisinik maleruagassanillu allanngortitereratarsinnaanermut tunngaviliissaaq, nassuiaammik saqqummiussissalluni. Saqqummiussassaaq UKA27-mi saqqummiunneqassaaq.”

Lars Poulsen, Siumut